



Broj:

Sarajevo, 04.11.2020. godine

PRIMLIENO: 05-11-2020		Redni broj	Broj priloga
Organizaciona jedinica	Klasifikaciona oznaka		
01-	50-1	2165/20	

PARLAMENTARNA SKUPŠTINA BOSNE I HERCEGOVINE  
PREDSTAVNIČKI DOM

n/r predsjedavajućeg, gđin. Nebojša Radmanović

Na osnovu člana 8. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 26/20), podnosim

**POSLANIČKU INICIJATIVU**

kojom Predstavnički dom Parlamentarne skupštine Bosne i Hercegovine zadužuje Vijeće ministara Bosne i Hercegovine da u što kraćem roku, a ne kasnije od 10 dana od dana usvajanja ove inicijative, usvoji Strategiju za borbu protiv korupcije Bosne i Hercegovine za period 2020.-2024. godina i prateći Akcioni plan, a što je obaveza iz Mišljenja Evropske komisije o zahtjevu Bosne i Hercegovine za članstvo u Evropskoj uniji i pratećeg Analitičkog izvještaja.

**Obrazloženje**

Strategija za borbu protiv korupcije Bosne i Hercegovine za period 2015.-2019. godina prestala je da važi i sada je neophodno da se usvoji nova Strategija koja će obuhvatiti period od 2020. do 2024. godine. S obzirom da Vijeće ministara Bosne i Hercegovine još uvijek nije usvojilo novu Strategiju i Akcioni plan za njeno provođenje, a koji je pripremljen još početkom ove godine, imamo pravni vakuum u ovoj oblasti koji je potrebno u što kraćem roku popuniti usvajanjem novog strateškog dokumenta. Zbog neusvajanja Državne strategije ni drugi nivoi vlasti u Bosni i Hercegovini ne mogu usvojiti svoje strategije koje bi trebale biti usklađene sa općim principima Državne strategije. Također, dodatni problem predstavlja činjenica da 75 državnih institucija ne mogu revidirati svoje planove za borbu protiv korupcije, što im je zakonska obaveza, koju direktno krše činjenicom da ne postoji važeća Strategija za borbu protiv korupcije na nivou Bosne i Hercegovine. Na potrebu usvajanja nove Strategije ranije su upozoravali i Misija OSCE-a u Bosni i Hercegovini, Delegacija Evropske unije u Bosni i Hercegovini i Ambasada Sjedinjenih Američkih Država u Bosni i Hercegovini. Također, na potrebu usvajanja ovog dokumenta upozorava i državna Agencija za prevenciju i koordinaciju borbe protiv korupcije koja je prema članu 10. Zakona o Agenciji za prevenciju korupcije i koordinaciju borbe protiv korupcije („Službeni glasnik BiH“, br. 103/09 i 58/13) nadležna za „izradu Strategije za borbu protiv korupcije i Akcionog plana, te za koordinaciju i nadzor nad provođenjem Strategije i Akcionog plana“.

Osim toga, oblast borbe protiv korupcije detaljno je obuhvaćena Mišljenjem Evropske komisije o zahtjevu Bosne i Hercegovine za članstvo u Evropskoj uniji gdje stoji sljedeće: *„Borbu protiv korupcije i organiziranog kriminala ometaju nedovoljno usklađeni propisi u zemlji i slaba institucionalna saradnja i koordinacija. Raširena je korupcija i svi nivoi vlasti pokazuju znakove da su pod kontrolom politike, što direktno utiče na svakodnevni život građana, posebno u oblastima zdravstva, obrazovanja, zapošljavanja i javnih nabavki. Okvir strateške politike, te institucionalni i pravni okvir za sprečavanje korupcije su fragmentirani i imaju značajne nedostatke. Pravomoćno osuđujuće presude u predmetima korupcije na visokom nivou su vrlo rijetke i sankcije nemaju adekvatan preventivni učinak“*. Nadalje, Evropska komisija je u oktobru 2020. godine objavila saopćenje sa ključnim nalazima iz Izvještaja o Bosni i Hercegovini za 2020. godinu gdje se navodi da *„Bosna i Hercegovina nije postigla napredak u rješavanju ključnih prioriteta iz Mišljenja i preporuka iz 2019. godine u ovoj oblasti, niti po pitanju nalaza Izvještaja eksperata o pitanjima vladavine prava. Korupcija je i dalje široko rasprostranjena i predstavlja razlog za ozbiljnu zabrinutost, sa zabilježenim političkim klijentelizmom na svim nivoima vlasti, koji direktno utiče na svakodnevni život građana“*.

S tim u vezi, kao što je navedeno u Izvještaju Evropske komisije, ovo pitanje uvršteno je kao jedan od 14 ključnih prioriteta u Mišljenju Evropske komisije, gdje pod tačkom 7. jasno stoji obaveza Bosne i Hercegovine da *„jača prevenciju i borbu protiv korupcije i organizovanog kriminala“*. Usvajanje Strategije za borbu protiv korupcije i pratećeg Akcionog plana bio bi prvi korak u pravcu ispunjavanja ovog prioriteta, a navedeno je uvršteno i u Akcioni plan Vijeća ministara Bosne i Hercegovine za realizaciju prioriteta iz Analitičkog izvještaja Evropske komisije pod tačkom 7.1. sa rokom realizacije *„maj 2020. godine“*. Prema posljednjim informacijama, ovaj dokument je do sada bio dva puta na dnevnom redu sjednice Vijeća ministara BiH, ali oba puta je skinut sa dnevnog reda, te u tom smislu ovom inicijativom želimo pružiti podršku Vijeću ministara BiH da što prije realizira ovu obavezu.

S poštovanjem,

  
Dr. Denis Zvizdić